

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI RABU, 2 APRIL 2014, PUKUL 10.00 PAGI**

**Bil. 15**

---

**PERTANYAAN-PERTANYAAN BAGI JAWAB LISAN**

1. PR-1321-L59682  
**Dato' Ir. Haji Nawawi bin Ahmad [ Langkawi ]** minta **MENTERI KERJA RAYA** menyatakan kebiasaannya apabila musim cuti sekolah atau musim perayaan, menyebabkan kedatangan pelancong ke Langkawi melalui Jeti Kuah melebihi kebiasaan. Ini menyebabkan akan berlaku kesesakan di laluan Pekan Kuah ke Jeti Kuah. Justeru akan menyebabkan pelancong tertinggal bot dan sebagainya. Apakah ada perancangan Kementerian untuk menyelesaikan masalah ini.
2. PR-1321-L60023  
**Tuan Gobind Singh Deo [ Puchong ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan berapa banyak projek perumahan terbengkalai di kawasan Parlimen Puchong dan apakah langkah-langkah untuk menyelesaikannya.
3. PR-1321-L59126  
**Dato' Wira Othman bin Abdul [ Pendang ]** minta **MENTERI KEWANGAN** menyatakan:-
  - (a) apakah benar 70 peratus syarikat yang disenaraikan di Bursa Malaysia menepati kehendak syariah seperti yang dilaporkan oleh media; dan
  - (b) berikan 10 syarikat yang teratas dari segi modal yang dikatakan menepati kehendak syariah itu.
4. PR-1321-L61008  
**Tuan Shamsul Iskandar bin Mohd Akin [ Bukit Katil ]** minta **MENTERI DALAM NEGERI** menyatakan:-
  - (a) kos kebajikan atau kehidupan yang ditanggung oleh Kerajaan bagi setiap orang banduan yang ditahan dalam penjara di Malaysia; dan
  - (b) sama ada layanan terhadap banduan adalah berdasarkan "United Nations Prison-Related Standards and Norms".

5. PR-1321-L60032  
**Tuan Nogeh anak Gumbek [ Mas Gading ]** minta **MENTERI SUMBER MANUSIA** menyatakan adakah Kementerian akan campur tangan supaya pekerja tempatan bergaji hari diserap untuk gaji bulanan minimum RM800 dalam sektor perladangan terutamanya dengan Syarikat Berkaitan Kerajaan (GLCs).
6. PR-1321-L60047  
**Tuan Abdullah Sani bin Abdul Hamid [ Kuala Langat ]** minta **PERDANA MENTERI** menyatakan keperluan mengkaji untuk mengecilkan gaji dan elaun kakitangan awam dalam keadaan sara hidup yang lebih tinggi dan keperluan barangan yang meningkat.
7. PR-1321-L59710  
**Dato' Ar. Wan Mohammad Khair-il Anuar bin Wan Ahmad [ Kuala Kangsar ]** minta **MENTERI WILAYAH PERSEKUTUAN** menyatakan adakah Kementerian sedar kadar caj meletak kenderaan di Kuala Lumpur adalah tidak seragam dan tidak munasabah. Adakah ianya dikawal selia oleh DBKL dan syarikat-syarikat swasta mengikut kategori-kategori dengan kadar yang boleh diterima pakai oleh pengguna.
8. PR-1321-L61134  
**Dato' Fauzi bin Abdul Rahman [ Indera Mahkota ]** minta **PERDANA MENTERI** menyatakan sama ada Jabatan Perdana Menteri, melalui Majlis Keselamatan Negara, bersedia mengadakan mesyuarat bersama dengan semua ahli-ahli Parlimen dan ADUN-ADUN di daerah Kuantan untuk mencari punca dan penyelesaian berlakunya banjir setiap tahun di musim tengkujuh yang menyebabkan kerugian berpuluh-puluh juta ringgit kepada ribuan penduduk Kuantan dan juga boleh menjana kaedah untuk meminimalkan kesan tengkujuh supaya penduduk Kuantan dapat diselamatkan daripada kerugian tahunan tersebut.
9. PR-1321-L60565  
**Datuk Hajah Norah binti Abd Rahman [ Tanjong Manis ]** minta **MENTERI PERUSAHAAN PERLADANGAN DAN KOMODITI** menyatakan adakah Kementerian akan mengikut jejak langkah negara Ivory Coast untuk menyaman pihak-pihak yang memburuk-burukkan penanaman kelapa sawit atas tanah gambut dan penyebaran bahawa penggunaannya membahayakan kesihatan adalah tidak benar dan berniat menghalang pembangunan.
10. PR-1321-L59792  
**Tuan Tan Kok Wai [ Cheras ]** minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada satu rang undang-undang diskriminasi 'disabiliti' akan digubal bagi mempromosikan dan melindungi hak golongan yang berupa OKU. Jika tidak, mengapa. Nyatakan jumlah aduan daripada OKU sejak 3 tahun lepas untuk layanan yang sama rata dan akses pada pekerjaan, perumahan, pengangkutan dan di bidang perkhidmatan swasta dan Kerajaan.

11. PR-1321-L60296  
**Tuan Wan Hasan bin Mohd Ramli [ Dungun ]** minta **MENTERI PENDIDIKAN** menyatakan keberkesanan Pelan Pembangunan Pendidikan Malaysia yang melibatkan akhlak guru dan pelajar dan apakah tindakan yang dikenakan terhadap individu yang mencederakan YB Timbalan Menteri Pendidikan di Hulu Selangor pada 11 Januari 2014 lalu.
12. PR-1321-L60083  
**Tuan Nga Kor Ming [ Taiping ]** minta **PERDANA MENTERI** menyatakan berapakah jumlah bilangan kakitangan kerajaan yang bekerja di Jabatan Peguam Negara mengikut kategori masing-masing serta jumlah peruntukan kerajaan untuk Jabatan tersebut.
13. PR-1321-L59840  
**Tuan Khoo Soo Seang [ Tebrau ]** minta **MENTERI PENDIDIKAN** menyatakan jumlah guru yang telah menamatkan pendidikan mereka di Maktab Perguruan tetapi belum mendapat penempatan ke sekolah-sekolah Kerajaan dan perancangan Kementerian terhadap mereka.
14. PR-1321-L60410  
**Tuan Ahmad Marzuk bin Shaary [ Bachok ]** minta **MENTERI PERTANIAN DAN INDUSTRI ASAS TANI** menyatakan status kemajuan Projek Estet Padi NKEA di setiap negeri. Apakah jaminan Kerajaan pengusaha padi sedia ada tidak ditindas dan apa-apa pembaharuan dalam industri padi tidak hanya mengutamakan keuntungan syarikat pengusaha.
15. PR-1321-L60659  
**Dato' Haji Irmohizam bin Haji Ibrahim [ Kuala Selangor ]** minta **MENTERI KOMUNIKASI DAN MULTIMEDIA** menyatakan sekiranya Kementerian akan mengusul undang-undang baharu khusus untuk membanteras gejala merakam dan menyebarkan video klip yang mempunyai unsur sensitif kaum dan agama serta persendaan pemimpin tertinggi negara dan Kerajaan yang dapat mencemar imej negara di persada antarabangsa.
16. PR-1321-L59273  
**Tuan Wong Tien Fatt @ Wong Nyuk Foh [ Sandakan ]** minta **MENTERI PENDIDIKAN** menyatakan:-
  - (a) mengapa banyak kontrak perkhidmatan untuk sekolah-sekolah di Sabah yang diberi kepada syarikat-syarikat atau individu-individu yang berasal dari luar Sabah; dan
  - (b) adakah rakyat Sabah begitu kurang keupayaan seperti dalam bidang kawalan keselamatan (security guard) dan sebagainya, sehingga pihak sekolah hanya dapat mengadu melalui telefon.
17. PR-1321-L60129  
**Datuk Joseph Salang anak Gandum [ Julau ]** minta **PERDANA MENTERI** menyatakan impak 1MTC kepada Kerajaan dan sejauh mana penggunaan 1MTC oleh agensi-agensi Kerajaan dan rakyat.

18. PR-1321-L60583  
**Tuan Sim Chee Keong [ Bukit Mertajam ]** minta **MENTERI PELANCONGAN DAN KEBUDAYAAN** menyatakan secara terperinci apakah rancangan Kerajaan Pusat untuk merancakkan industri pelancongan Pulau Pinang sempena Tahun Melawat Malaysia 2014 serta berapakah jumlah peruntukan pelancongan kepada Pulau Pinang dari tahun 2004-2014.
19. PR-1321-L60713  
**Puan Hajah Normala binti Abdul Samad [ Pasir Gudang ]** minta **MENTERI PENDIDIKAN** menyatakan mekanisme yang digunakan untuk mengawal penguatkuasaan dan pemantauan terhadap pusat-pusat tuisyen swasta berkenaan dengan sukatan dan kaedah pembelajaran serta kelayakan tenaga pengajar yang digunakan.
20. PR-1321-L59397  
**Ir. Shaharuddin bin Ismail [ Kangar ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan adakah Kementerian mempunyai cadangan untuk membangunkan kemudahan kompleks tempat letak kereta bertingkat di Kuala Perlis bagi mengatasi masalah ruang meletak kenderaan yang tidak mencukupi dan lebih efisien bagi pelancong yang ingin meletakkan kenderaan untuk ke Pulau Langkawi.
21. PR-1321-L59664  
**Tuan Haji Hasbi bin Haji Habibollah [ Limbang ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan apakah langkah Kementerian untuk menangani kenaikan harga barang di pasaran akibat manipulasi oleh "distributor".
22. PR-1321-L60416  
**Puan Alice Lau Kiong Yieng [ Lanang ]** minta **MENTERI DALAM NEGERI** menyatakan:-
- (a) bilangan serbuan ke atas mesin perjudian haram (mesin kuda) yang dijalankan di Sibu pada setiap tahun dari 2011 hingga 2014; dan
  - (b) bilangan kes yang telah dibawa ke mahkamah serta bilangan kes yang dikenakan hukuman dan langkah-langkah yang telah diambil dan akan diambil untuk menutupkan semua kedai mesin perjudian haram di Sibu dan Sarawak.
23. PR-1321-L59960  
**Dato' Othman bin Aziz [ Jerlun ]** minta **MENTERI PENDIDIKAN** menyatakan bagaimanakah Kementerian menetapkan bentuk hukuman denda yang boleh diambil oleh guru terhadap pelajar yang melanggar disiplin di sekolah bagi membolehkan guru-guru menjalankan amanah dan tanggungjawab mereka dengan sempurna tanpa campur tangan pihak luar.

24. PR-1321-L60065  
**Tuan Karpal Singh [ Bukit Gelugor ]** minta **MENTERI DALAM NEGERI** menyatakan kepada Dewan bilangan pendatang tanpa izin ditahan dalam tempoh 10 tahun terakhir dengan memberi pecahan kepada kewarganegaraan.
25. PR-1321-L61172  
**Dato' Sri Azalina binti Dato' Othman Said [ Pengerang ]** minta **PERDANA MENTERI** menyatakan sama ada Kerajaan bercadang untuk menggubal undang-undang untuk menghalang parti-parti politik dan ahli-ahli Parlimen serta ADUN daripada meletakkan jawatan sewenang-wenangnya menurut agenda tersendiri dan bukan untuk kepentingan rakyat jelata kerana pilihan raya kecil yang diakibatkan oleh tindakan tersebut memakan belanja yang tinggi dan membazirkan wang pembayar cukai.
26. PR-1321-L60231  
**Tuan Jeff Ooi Chuan Aun [ Jelutong ]** minta **PERDANA MENTERI** menyatakan tentang skim perumahan PR1MA di mana terdapat sebanyak 20,000 unit di Pulau Pinang sepertimana yang diumumkan pada tahun 2013. Di manakah lokasi, jadual pembangunan serta status kemajuan terkini.
27. PR-1321-L60745  
**Datuk Madius Tangau [ Tuaran ]** minta **MENTERI KERJA RAYA** menyatakan berapakah bilangan pemegang Konsesi Lebuhraya Bertol di negara kita dan bilakah tempoh perjanjian konsesi tersebut tamat.
28. PR-1321-L60530  
**Puan Hajah Fuziah binti Salleh [ Kuantan ]** minta **MENTERI KEMAJUAN LUAR BANDAR DAN WILAYAH** menyatakan usaha bagi mempertingkatkan prestasi dan kecekapan Jabatan Kemajuan Orang Asli (JAKOA), terutamanya dalam isu pewartaan tanah adat Orang Asli di Semenanjung Malaysia di samping menjaga kepentingan komuniti tersebut secara menyeluruh.
29. PR-1321-L59140  
**Datuk Bung Moktar bin Radin [ Kinabatangan ]** minta **MENTERI PENDIDIKAN** menyatakan usaha Kerajaan untuk menaiktarafkan kemudahan pembelajaran sekolah-sekolah di kawasan luar bandar di negara ini.
30. PR-1321-L61221  
**Puan Teo Nie Ching [ Kulai ]** minta **PERDANA MENTERI** menyatakan sama ada Kementerian Komunikasi dan Multimedia ada menuntut balik bayaran yang terlebih bayar kepada Telekom untuk MERS 999, seperti yang dicadangkan oleh Laporan Ketua Audit Negara 2012.
31. PR-1321-L59771  
**Tuan Anuar bin Abd. Manap [ Sekijang ]** minta **MENTERI PERTAHANAN** menyatakan:-
- (a) apakah bentuk persiapan dan keupayaan Angkatan Tentera Malaysia (ATM) untuk menghadapi bencana di dalam negara seperti banjir, gempa bumi, tanah runtuh dan lain-lain; dan

- (b) berapakah jumlah kos yang ditanggung oleh pihak ATM bagi menghadapi banjir dalam negara pada penghujung tahun 2013.

32. PR-1321-L61268

**Dato' Mohd Ariff Sabri bin Abdul Aziz [ Raub ]** minta **MENTERI PERTAHANAN** menyatakan:-

- (a) mengenai status 2 buah kapal latihan yang dibina oleh NGC Tech shipyard di Banting Selangor, yang menelan belanja RM943 juta. Sudahkah dua kapal latihan (*training ships*) ini siap memandangkan isteri Perdana Menteri sekarang dan isteri bekas Perdana Menteri yang menerajui negara Malaysia selama 22 tahun telah pun melancarkan dua buah kapal ini; dan
- (b) mengapakah limbungan kapal ini sekarang berada dalam '*receivership*' dan apa tindakan yang diambil ke atas '*non-performance of contracts*'.

33. PR-1321-L59314

**Tuan Haji Ahmad Nazlan bin Idris [ Jerantut ]** minta **MENTERI PELANCONGAN DAN KEBUDAYAAN** menyatakan adakah Kementerian berhasrat untuk mengadakan Pegawai Penerangan Pelancongan bagi setiap kawasan Parlimen dan jika tiada, nyatakan bagaimanakah cara penerangan yang berkesan dapat disampaikan kepada pelancong-pelancong yang datang.

34. PR-1321-L60501

**Dato' Noraini binti Ahmad [ Parit Sulong ]** minta **MENTERI KEMAJUAN LUAR BANDAR DAN WILAYAH** menyatakan apakah pencapaian-pencapaian Pusat Transformasi Luar Bandar (RTC) dan bilangan usahawan-usahawan wanita yang telah berjaya membina perniagaan mereka di bawah bimbingan RTC sejak penubuhannya.

35. PR-1321-L60947

**Tuan Wong Sze Phin @ Jimmy [ Kota Kinabalu ]** minta **MENTERI PELANCONGAN DAN KEBUDAYAAN** menyatakan statistik bilangan pelancong dalam dan luar Malaysia bagi setiap negeri berdasarkan negeri dan negara asal pada tahun 2004 hingga 2013. Nyatakan pendapatan yang diperoleh dari industri pelancongan di setiap negeri.

36. PR-1321-L60634

**Dato' Shamsul Anuar bin Haji Nasarah [ Lenggong ]** minta **MENTERI PERTANIAN DAN INDUSTRI ASAS TANI** menyatakan :-

- (a) usaha dan keberkesanan memerangi orang tengah dalam usaha menjaga kepentingan petani, penternak dan nelayan; dan
- (b) apakah Kementerian mempunyai cadangan atau perancangan melibatkan GLC Kerajaan dalam mengeluarkan makanan secara besaran .

37. PR-1321-L60124  
**Tuan William @ Nyallau anak Badak [ Lubok Antu ]** minta **PERDANA MENTERI** menyatakan apakah usaha-usaha Suruhanjaya Perkhidmatan Awam (SPA) untuk merakyatkan perkhidmatan awamnya sejajar dengan agenda negara “Rakyat Didahulukan, Pencapaian Diutamakan”.
38. PR-1321-L60597  
**Tuan Liew Chin Tong [ Kluang ]** minta **MENTERI DALAM NEGERI** menyatakan senarai jadual statistik terperinci kes jenayah keganasan dan harta benda dengan perinci seperti kes rogol, bunuh, ragut dan sebagainya yang berlaku di Johor menurut 13 Ibu Pejabat Polis Daerah (IPD) dari tahun 2008 hingga 2014.
39. PR-1321-L59894  
**Tuan Liang Teck Meng [ Simpang Renggam ]** minta **MENTERI PERDAGANGAN ANTARABANGSA DAN INDUSTRI** menyatakan bagaimanakah cara SME Bank untuk memupuk minat keusahawanan di kalangan generasi muda.
40. PR-1321-L60614  
**Tuan Mohamed Hanipa bin Maidin [ Sepang ]** minta **MENTERI PELANCONGAN DAN KEBUDAYAAN** menyatakan bilakah Kerajaan akan memajukan kawasan pelancongan di Batu Laut bagi menjadikan ia sebagai pusat pelancongan yang indah dan moden dengan kemudahan prasarana yang canggih dan lengkap sesuai dengan Batu Laut menjadi tuan rumah pertandingan perahu layar antarabangsa setiap tahun.
41. PR-1321-L60206  
**Dato' Dr. Nik Mazian bin Nik Mohamad [ Pasir Puteh ]** minta **MENTERI PERTANIAN DAN INDUSTRI ASAS TANI** menyatakan kedudukan pertanian padi di negeri Kelantan : keluasan tanah yang ditanam padi , bilangan petani , hasil sehektar dan bantuan subsidi-subsidi yang diagihkan kepada petani-petani. Apakah yang menyebabkan hasil padi semakin menurun dan apakah musuh-musuh perosak yang dikenal pasti mengancam pertanian padi.
42. PR-1321-L61055  
**Dato' Ahmad Fauzi bin Zahari [ Setiawangsa ]** minta **MENTERI PERTANIAN DAN INDUSTRI ASAS TANI** menyatakan adakah pembinaan Pasar Rakyat 1Malaysia bagi penawaran bahan mentah yang lebih murah boleh dipertimbangkan. Idea ini boleh digandingkan bersama Lembaga Kemajuan Ikan Malaysia yang pernah mencadangkan pelaksanaan Projek Ikan Rakyat 1Malaysia yang meletakkan persatuan-persatuan nelayan sebagai “main players”.
43. PR-1321-L60624  
**Tuan Julian Tan Kok Ping [ Stampin ]** minta **MENTERI KEWANGAN** menyatakan jumlah rakyat yang membayar cukai dari tahun 2008 ke 2013. Senaraikan bilangan rakyat dari segi jumlah pendapatan bulanan tidak termasuk bonus, iaitu: kurang daripada RM3000, RM3001-RM5000, RM5001-RM8000, RM8001-RM10,000 dan RM10,000 ke atas.

44. PR-1321-L61091  
**Tuan Lim Lip Eng [ Segambut ]** minta **MENTERI KERJA RAYA** menyatakan ganti rugi RM400 juta yang perlu dibayar kepada syarikat-syarikat konsesi tol, susulan keputusan Kerajaan tidak menaikkan kadar tol tahun ini, mengikut nama syarikat dan jumlah dibayar, bagaimana Kerajaan mendapat peruntukan untuk membiayainya dan cara pengiraan ganti rugi itu.
45. PR-1321-L60819  
**Tuan Tony Pua Kiam Wee [ Petaling Jaya Utara ]** minta **PERDANA MENTERI** menyatakan mesyuarat dan tindakan yang telah diambil oleh jawatankuasa khas yang diketuai oleh Ketua Setiausaha Negara untuk menangani isu-isu yang terbangkit dalam Laporan Audit Negara. Berapa pegawai yang bertanggungjawab dikenakan tindakan atas kelalaian atau penyelewengan, dan apakah tindakan yang telah diambil.
46. PR-1321-L60876  
**Dr. Lee Boon Chye [ Gopeng ]** minta **MENTERI KESIHATAN** menyatakan bilangan kes demam denggi setiap tahun pada tahun 2004 hingga 2013.
47. PR-1321-L59899  
**Datuk Ahmad Jazlan bin Yaakub [ Machang ]** minta **MENTERI KOMUNIKASI DAN MULTIMEDIA** menyatakan apakah bentuk-bentuk perubahan yang telah, sedang dan bakal dilakukan oleh Kementerian melalui Agensinya BERNAMA TV, dalam menaik taraf dan meningkatkan kualiti kandungan berita dan pengisian supaya setaraf dengan CNN, BBC, Al-Jazeera.
48. PR-1321-L60161  
**Dato' Seri Anwar bin Ibrahim [ Permatang Pauh ]** minta **MENTERI KOMUNIKASI DAN MULTIMEDIA** menyatakan langkah-langkah Kerajaan bagi menangani penurunan indeks kebebasan media Malaysia ke tangga 147 daripada 180 negara menurut World Press Freedom Index.
49. PR-1321-L59445  
**Datuk Noor Ehsanuddin bin Mohd Harun Narrashid [ Kota Tinggi ]** minta **MENTERI DALAM NEGERI** menyatakan adakah langkah Kementerian mewujudkan tabung sampel DNA ini dijangka mampu menjadi mekanisme berkesan dalam rangka membasmi kes pembuangan bayi yang semakin tidak terkawal di samping membantu pihak berkuasa menangani pelbagai kes jenayah berat.
50. PR-1321-L59286  
**Dato' Kamarul Baharin bin Abbas [ Telok Kemang ]** minta **MENTERI SAINS, TEKNOLOGI DAN INOVASI** menyatakan:-
- (a) projek-projek yang telah dilaksanakan dan dalam perancangan yang dikendalikan atau dibiayai oleh Malaysia Biotech Corporation; dan
  - (b) nilai tiap-tiap projek semenjak tiga tahun yang lalu.



51. PR-1321-L60874  
**Dr. Lee Boon Chye [ Gopeng ]** minta **MENTERI KEWANGAN** menyatakan jumlah hutang yang dijamin oleh Kerajaan dan senaraikan 10 syarikat utama mengikut jumlah yang dijamin.
52. PR-1321-L59326  
**Dr. Noor Azmi bin Ghazali [ Bagan Serai ]** minta **MENTERI SAINS, TEKNOLOGI DAN INOVASI** menyatakan apakah peranan agensi-agensi seperti Pusat Sains Negara dan Akademi Sains Malaysia dalam usaha mencapai nisbah sains:sastera 60:40 seperti yang diperlukan oleh negara Malaysia dalam misi persiapannya menuju negara maju.
53. PR-1321-L59200  
**Tuan Idris bin Haji Ahmad [ Bukit Gantang ]** minta **MENTERI PENDIDIKAN** menyatakan berapakah kadar maksimum masa untuk seorang guru mengajar di dalam seminggu.
54. PR-1321-L59625  
**Puan Nurul Izzah binti Anwar [ Lembah Pantai ]** minta **MENTERI PERDAGANGAN ANTARABANGSA DAN INDUSTRI** menyatakan:-
- (a) bilakah edaran laporan impak hasil ke atas GLC dan kepentingan nasional akan diedar di Dewan Rakyat; dan
  - (b) adakah Kaukus Parlimen berkenaan Perjanjian TPP akan dinaiktaraf kepada Jawatankuasa Pemilih Parlimen berkenaan TPP dan bilakah ratifikasi akan di laksana.
55. PR-1321-L59478  
**Laksamana Pertama Mohamad Imran bin Abd Hamid (B) [ Lumut ]** minta **MENTERI PENGANGKUTAN** menyatakan adakah projek naik taraf Jeti Kargo di Pulau Pangkor boleh dilaksanakan pada tahun 2014 dan projek harus ditawarkan kepada kontraktor tempatan atau dari negeri Perak.
56. PR-1321-L59745  
**Datuk Wee Jeck Seng [ Tanjong Piai ]** minta **PERDANA MENTERI** menyatakan:-
- (a) status Majlis Konsultasi Negara dalam merencanakan lagi perpaduan serta keharmonian di kalangan rakyat Malaysia terutamanya bagi mengatasi masalah perkauman yang kerap dimainkan di media massa pada ketika ini; dan
  - (b) apakah langkah atau inisiatif yang telah dilakukan oleh MKN bagi mengekalkan kestabilan masyarakat serta membanteras segala bentuk tindakan atau ucapan yang berbentuk perkauman yang ekstremis di Malaysia.

57. PR-1321-L60295  
**Dato' Ngeh Koo Ham [ Beruas ]** minta **MENTERI KEWANGAN** menyatakan kenapa 1Malaysia Development Berhad ditubuhkan untuk membangun projek-projek berkenaan dengan tenaga (*energy*), hartanah, pelancongan dan perniagaan pertanian. Penubuhan 1MDB bersaing dengan pihak swasta dan kenapa Kerajaan tidak membiarkan pembangunan sedemikian dibangunkan oleh pihak swasta.
58. PR-1321-L60096  
**Tuan Er Teck Hwa [ Bakri ]** minta **PERDANA MENTERI** menyatakan jumlah kes yang dilaporkan kepada SPRM, disiasat, dijatuhkan hukuman dan dibebaskan atau diberikan amaran sahaja mengikut pecahan daerah, tuduhan dan tahun dari 2008 hingga 2013.
59. PR-1321-L60830  
**Datuk Rozman bin Isli [ Labuan ]** minta **MENTERI PENGANGKUTAN** menyatakan berdasarkan status Labuan sebagai hub logistik minyak dan gas yang menjadi pintu masuk peralatan minyak dan gas (*Oil & Gas Tools*) di mana sembilan (9) penerbangan pesawat kargo udara dijadualkan setiap minggu. Adakah pihak Kementerian merancang untuk mendirikan terminal kargo di Lapangan Terbang Labuan dalam masa terdekat ini.
60. PR-1321-L60107  
**Tuan Hee Loy Sian [ Petaling Jaya Selatan ]** minta **MENTERI PEMBANGUNAN WANITA, KELUARGA DAN MASYARAKAT** menyatakan kenaikan bantuan bulanan kepada warga miskin dan golongan kurang upaya daripada RM300 ke RM500 terutama di bandar raya di mana kos sara hidup semakin meningkat.
61. PR-1321-L61070  
**Tuan Wong Chen [ Kelana Jaya ]** minta **MENTERI KEWANGAN** menyatakan sama ada beliau akan mengarahkan 1MDB untuk mempamerkan akaun kewangan tahun 2011, 2012 dan 2013 (jika bersedia) dalam laman web 1MDB dan memastikan taraf pendedahan 1MDB setaraf dengan Khazanah dan KWSP, dan jika tidak, nyatakan sebab mengapa.
62. PR-1321-L60449  
**Tuan Mohd Rafizi bin Ramli [ Pandan ]** minta **MENTERI PERTAHANAN** menyatakan tarikh dalam tahun bila mana seorang yang bernama Wan Muhamad Azri bin Wan Deris (No KP:830121-03-5019) telah dibenarkan menaiki kapal selam Scorpene dan apakah tujuan Wan Muhammad Azri bin Wan Deris (No KP:830121-03-5019) tersebut dibenarkan menaiki kapal selam Scorpene tersebut.
63. PR-1321-L60375  
**Tuan Nik Mohamad Abduh bin Nik Abdul Aziz [ Pasir Mas ]** minta **MENTERI BELIA DAN SUKAN** menyatakan jumlah peruntukan yang telah dibelanjakan dan hasil penyelidikan yang telah dilakukan oleh Institut Penyelidikan Pembangunan Belia Malaysia pada tahun 2013.

64. PR-1321-L60925  
**Tuan Haji Nasrudin bin Hassan [ Temerloh ]** minta **MENTERI PENDIDIKAN** menyatakan jumlah dan jenis jenayah yang telah dilakukan oleh mahasiswa sejak tahun 2010 hingga 2013.
65. PR-1321-L59828  
**Tuan Su Keong Siong [ Ipoh Timor ]** minta **MENTERI DALAM NEGERI** menyatakan jumlah cybercafe di Malaysia yang beroperasi secara haram. Apakah langkah-langkah yang telah diambil oleh Kerajaan untuk membanteras operasi atau kegiatan cybercafe haram dan apakah hasilnya.
66. PR-1321-L60516  
**Tuan R. Sivarasa [ Subang ]** minta **MENTERI KOMUNIKASI DAN MULTIMEDIA** menyatakan apakah Kementerian menggunakan software FinSpy yang ditawarkan oleh Syarikat Finfisher dari Jerman untuk mengawasi rakyat Malaysia berikutan dengan laporan yang dikeluarkan oleh The Citizen Lab berkenaan dengan penemuan server FinFisher di Malaysia dan suatu dokumen turut dihantarkan kepada pengguna emel Malaysia semasa kempen Pilihan Raya Umum ke-13 mengandungi malware FinSpy.
67. PR-1321-L61207  
**Dr. Hajah Siti Mariah binti Mahmud [ Kota Raja ]** minta **MENTERI PERTAHANAN** menyatakan motif pihak ATM mendakwa Mejar Zaidi Ahmad kerana mendedahkan isu dakwat tidak kekal dalam PRU-13.
68. PR-1321-L60005  
**Dato' Sri Liow Tiong Lai [ Bentong ]** minta **PERDANA MENTERI** menyatakan apakah status dan perkembangan Program Transformasi Ekonomi atau ETP dalam mewujudkan golongan pekerja bergaji tinggi serta menaikkan pendapatan rakyat dan negara.
69. PR-1321-L60879  
**Dr. Lee Boon Chye [ Gopeng ]** minta **MENTERI KOMUNIKASI DAN MULTIMEDIA** menyatakan langkah yang diambil selepas Malaysia jatuh sebanyak 23 anak tangga dalam Indeks Kebebasan Media Dunia 2013 ke tangga 145 dari 179 negara.
70. PR-1321-L60395  
**Dato' Haji Mahfuz bin Omar [ Pokok Sena ]** minta **MENTERI PERTANIAN DAN INDUSTRI ASAS TANI** menyatakan kenapa harga lantai padi tidak dapat dinaikkan dari RM750 per metrik tan kepada RM1200 per metrik tan.
71. PR-1321-L59419  
**Dato' Mansor bin Othman [ Nibong Tebal ]** minta **MENTERI PENDIDIKAN** menyatakan sama ada Kerajaan bersedia memberikan kuasa otonomi kepada IPTA - IPTA di Malaysia memandangkan Pemangku Raja Perak, Raja Nazrin Shah, pun menitahkan bahawa kecemerlangan sesebuah IPT bergantung kepada dua pendekatan utama yang diamalkan iaitu menghargai otonomi intelek dan memiliki kewangan.

72. PR-1321-L60331  
**Tuan Haji Khalid bin Abdul Samad [ Shah Alam ]** minta **PERDANA MENTERI** menyatakan status projek Petronas di Kanada dan apakah kerugian yang ditanggung oleh Petronas sekiranya ada.
73. PR-1321-L60912  
**Datuk Ir. Dr. Wee Ka Siong [ Ayer Hitam ]** minta **MENTERI DALAM NEGERI** menyatakan sama ada program pemutihan bagi pekerja asing akan dihidupkan semula memandangkan keperluan di pasaran khususnya dari sektor perkhidmatan pertanian dan sektor pembinaan.
74. PR-1321-L60804  
**Dr. Mansor bin Abd Rahman [ Sik ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah perancangan dan kriteria di pihak Kementerian untuk mengenal pasti potensi bandar-bandar baru yang boleh diwujudkan di kawasan luar bandar di negeri-negeri yang dikenal pasti untuk mengimbangi kepadatan penduduk serta perkembangan ekonomi.
75. PR-1321-L59668  
**Tan Sri Dato' Seri Abd Khalid bin Ibrahim [ Bandar Tun Razak ]** minta **MENTERI WILAYAH PERSEKUTUAN** menyatakan perincian perbelanjaan RM57.9 juta yang telah diperuntukkan oleh Dewan Bandaraya Kuala Lumpur (DBKL) untuk memperbaiki sistem trafik di Bandaraya Kuala Lumpur.

### **ATURAN URUSAN MESYUARAT DAN USUL-USUL**

1. **Menyambung semula pertimbangan Rang Undang-undang Perbekalan Tambahan (2013) 2014 (D.R. 1/2014) dan Usul Anggaran Perbelanjaan Pembangunan Tambahan Pertama 2013 seperti berikut:**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa jumlah wang tambahan sebanyak enam ratus empat puluh sembilan juta tiga ratus tujuh puluh lima ribu lapan ratus lima puluh ringgit (RM649,375,850) diperuntukkan daripada Kumpulan Wang Pembangunan bagi tahun kewangan 2013 bagi Maksud dan Butiran (Projek) seperti yang dinyatakan dalam ruang pertama dan kedua penyata Anggaran Perbelanjaan Pembangunan Tambahan Pertama 2013 yang dibentangkan sebagai Kertas Perintah 2 Tahun 2014 dan yang disenaraikan di sebelah Maksud dan Butiran (Projek) dalam ruang sembilan dan sepuluh penyata tersebut.”

**( Menteri Kewangan )**

**Dalam Jawatankuasa sebuah-buah Majlis ( 1 April 2014 )**

- |    |                |  |                               |
|----|----------------|--|-------------------------------|
| 2. | (D.R. 2/2014)  | Rang Undang-undang Cukai Barang dan Perkhidmatan 2014  | <b>Bacaan Kali Yang Kedua</b> |
|    |                | <b>[ Menteri Kewangan ]</b>  |                               |
| 3. | (D.R. 23/2013) | Rang Undang-undang Saraan Hakim (Pindaan) 2013   | “                             |
|    |                | <b>[ Menteri di Jabatan Perdana Menteri ]</b>  |                               |
| 4. | (D.R. 13/2013) | Rang Undang-undang Bahan-bahan Kakisan dan Letupan dan Senjata Berbahaya (Pindaan) 2013                | “                             |
|    |                | <b>[ Menteri Dalam Negeri ]</b>  |                               |
| 5. | (D.R. 24/2013) | Rang Undang-undang Pencegahan Pengubahan Wang Haram dan Pencegahan Pembiayaan Keganasan (Pindaan) 2013 | “                             |
|    |                | <b>[ Menteri Kewangan ]</b>  |                               |

6. **Menteri Kewangan akan mencadangkan:-**

"Bahawa Dewan ini, mengikut peruntukan di bawah Seksyen 5 Akta Persatuan Pembangunan Antarabangsa 1960, mengambil ketetapan supaya Malaysia membuat sumbangan kepada Program Penambahan Dana Ke 17 Persatuan Pembangunan Antarabangsa sebanyak USD27,000,000.00 (dua puluh juta sahaja)".

7. PR-1321-U59393

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, rakyat pada keseluruhannya berbesar hati dan mengalu-alukan usaha kerajaan dalam menangani masalah jenayah di negara ini dengan menubuhkan satu jabatan khusus dalam institusi kepolisan iaitu Jabatan Pencegahan dan Pembanterasan Jenayah Polis DiRaja Malaysia.

Dan mengambil maklum juga, bahawa umum mengetahui bahawa Jabatan Pencegahan dan Pembanterasan Jenayah PDRM ini hanya berfungsi di peringkat Ibu Pejabat Bukit Aman sahaja dan keanggotaannya amat terhad.

Dan mengambil maklum juga bahawa, kekangan yang dihadapi oleh JPPJ dan PDRM ini adalah disebabkan oleh kelewatan pihak Suruhanjaya Perkhidmatan Awam dalam memproses keperluan bagi perjawatan dan mengisi perjawatan dalam JPPJ-PDRM.

Dan mengambil maklum juga bahawa, rakyat dan masyarakat menaruh harapan serta kepercayaan penuh bahawa dengan tertubuhnya JPPJ-PDRM ini, kadar jenayah di negara ini akan dapat diturunkan pada kadar minima dan sekali gus menjadikan kebolehppercayaan rakyat mengenai dengan keselamatan negara ditingkatkan.

Maka, bagi menangani masalah yang dihadapi oleh JPPJ-PDRM ini, Dewan ini hendaklah mengambil ketetapan bahawa, pihak kerajaan hendaklah dalam kadar segera mendesak pihak Suruhanjaya Perkhidmatan Awam Malaysia untuk segera menyediakan perjawatan bagi semua jawatan yang diperlukan dalam Jabatan Pencegahan dan Pembanterasan Jenayah Polis DiRaja Malaysia, supaya jabatan ini dapat ditubuhkan di semua peringkat, iaitu peringkat Pusat Bukit Aman, peringkat Ibu Pejabat Polis Kontinjen dan Ibu Pejabat Polis Daerah, agar fungsinya sebagai Agensi Pencegahan dan Pembanterasan Jenayah dapat dilaksanakan dengan jayanya."

**( Perdana Menteri )**

8. PR-1321-U59394

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, sejak tertubuhnya Kawasan Keselamatan Khas Pantai Timur Sabah - ESSCOM, aliran keluar masuk pendatang asing kenegara ini, kini boleh dipantau sebanyak-sedikit.

Dan mengambil maklum juga, bahawa kawasan ESSCOM ini masih belum kebal-tembus oleh penceroboh asing yang selalu mengganggu-gugat keselamatan dan kedaulatan negara. Dan mengambil maklum juga bahawa, dengan aset sedia ada, kerja-kerja pengawasan dan perlindungan kawasan ESSCOM yang panjangnya sejauh 1400 kilometer amatlah rumit.

Dan juga mengambil maklum bahawa, pengendalian dan kos operasi aset-aset ESSCOM sedia ada amatlah tinggi dan bagi sesetengah situasi, agak merbahaya bagi anggota yang terlibat. Maka, bagi menangani masalah pengawasan dan perlindungan kawasan ESSCOM ini, dewan ini hendaklah mengambil ketetapan bahawa, selain dengan aset sedia ada, kerajaan hendaklah menggunakan khidmat kenderaan udara tanpa pemandu *drone - unmanned aerial vehicle*) terutama sekali bagi menjalankan kerja-kerja pengawasan perairan ESSCOM."

**( Perdana Menteri )**

9. PR-1321-U59409

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, kedai rakyat 1Malaysia - KR1M menawarkan harga barangan 30% - 40% lebih murah berbanding dengan kedai biasa. Dan mengambil maklum juga, bahawa hasrat murni kerajaan untuk mengurangkan bebanan kos sara hidup rakyat ini amatlah disanjung tinggi dan seharusnya dinikmati oleh semua lapisan rakyat terutama sekali mereka yang berpendapatan rendah jauh di pedalaman.

Dan mengambil maklum juga bahawa, hampir semua KR1M terletak di pekan-pekan utama terutama sekali di negeri Sabah. Kedudukan ini serba-sedikit membantutkan usaha kerajaan untuk mengurangkan beban kos sara hidup kumpulan sasar - kumpulan berpendapatan rendah, dari segi kebolehcapaian pengguna. Misalnya, adalah tidak praktikal bagi pengguna untuk ke pekan hanya untuk membeli sekilo tepung.

Dan mengambil maklum juga bahawa, hasrat kerajaan dalam menubuhkan KR1M ini boleh dipanjangkan lagi dengan konsep merakyatkan KR1M. Yakni pihak KR1M bolehlah menyediakan perkhidmatan jurujual dengan menggunakan van atau pun lori, di mana jurujual ini akan masuk ke seluruh kedai-kedai runcit yang terdapat di kampung-kampung, mukim dan sebagainya bagi membekalkan produk KR1M.

Dengan kaedah ini, produk KR1M dapat di boleh-capai oleh semua lapisan rakyat Malaysia. Maka, bagi memenuhi hasrat kerajaan dalam penubuhan KR1M, dewan ini hendaklah mengambil ketetapan bahawa, pihak kerajaan hendaklah memperluaskan lagi kebolehcapaian KR1M dengan memperluaskan pasaran produk KR1M melalui kaedah di atas."

**( Menteri Perdagangan Dalam Negeri, Koperasi Dan Kepenggunaan )**

10. PR-1321-U59411

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, Sekolah Rendah Jenis Kebangsaan Hwa Shiong Putatan terletak berhampiran dengan Lebu Raya Putatan - Papar.

Dan mengambil maklum juga, bahawa sekolah ini menempatkan lebih daripada 700 orang murid sekolah di mana lebih daripada 50% murid ini akan menyeberang Lebu Raya Putatan - Papar, bagi tujuan menaiki bas,kereta atau pun berjalan kaki untuk pergi dan pulang ke sekolah.

Dan mengambil maklum juga bahawa, lintasan ini juga digunakan oleh orang ramai.

Dan mengambil maklum juga bahawa, selain Lebu Raya Putatan - Papar, murid-murid SRJKC Hwa Shiong dan orang ramai juga kena melintasi laluan kereta api bagi tujuan urusan harian mereka. Maka, atas faktor keselamatan, Dewan ini hendaklah mengambil ketetapan bahawa, pihak Kerajaan hendaklah mendirikan jejantas pejalan kaki, menyeberangi rel kereta api dan Lebu Raya Putatan – Papar Berhadapan dengan SRJKC Hwa Shiong demi untuk keselamatan murid-murid sekolah dan orang awam."

**( Menteri Kerja Raya )**

11. PR-1321-U60274

**Dr. Tan Seng Giaw [ Kepong ]** akan mencadangkan:-

"Bahawa Dewan ini membahaskan langkah-langkah yang boleh memperkukuhkan keamanan dan perpaduan negara majmuk ini".

**( Perdana Menteri )**

12. PR-1321-U60276

**Dr. Tan Seng Giaw [ Kepong ]** akan mencadangkan:-

"Bahawa Dewan ini membincangkan projek memperbaiki Dewan yang bocor, tempoh yang diperlukan dan jumlah perbelanjaan, sebagai contoh teladan kepada negara".

**( Perdana Menteri )**



13. PR-1321-U60277

**Dr. Tan Seng Giaw [ Kepong ]** akan mencadangkan:-

"Bahawa Dewan ini menyatakan kadar pembangunan Internet yang terkini di semua aspek berbanding dengan negara seperti Korea Selatan. Apakah jenis pembangunan dan jumlah kosnya serta prestasinya."

**( Menteri Komunikasi dan Multimedia )**

14. PR-1321-U59580

**Tuan Fong Kui Lun [ Bukit Bintang ]** akan mencadangkan:-

"Bahawa Dewan ini menggesa Suruhanjaya Pilihanraya Malaysia dalam proses untuk melaksanakan persempadanan semula kawasan pilihan raya hendaklah memastikan wujud keseimbangan pemilih antara pilihan raya dan mengelak perbuatan menggerimander (gerrymandering) yang merugikan para pemilih."

**( Perdana Menteri )**

15. PR-1321-U59582

**Tuan Fong Kui Lun [ Bukit Bintang ]** akan mencadangkan:-

"Bahawa dewan ini menggesa Kerajaan hendaklah menyalurkan peruntukan tahunan bagi Ahli Parlimen secara adil, baik untuk wakil rakyat BN mahupun wakil rakyat pembangkang sebagaimana cadangan Kerajaan Negeri Pulau Pinang untuk menyalurkan peruntukan yang sama diterima oleh wakil-wakil rakyat pembangkang kepada wakil-wakil rakyat BN mulai tahun 2014."

**( Perdana Menteri )**

16. PR-1321-U60610

**Tuan Liew Chin Tong [ Kluang ]** akan mencadangkan:-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi RM100 juta oleh Kementerian Pertahanan, mesti dibawa ke Parlimen untuk dibahas dan diaudit oleh Jabatan Audit Negara untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan."

**( Menteri Pertahanan )**

17. PR-1321-U60119

**Tuan Hee Loy Sian [ Petaling Jaya Selatan ]** akan mencadangkan:-

"Bahawa Dewan ini menolak politik samseng dan perkauman serta menggesa perdebatan dasar secara rasional dan tanpa keganasan. Tindakan keganasan beberapa NGO pro-Kerajaan terhadap warganegara biasa dan mengugut bunuh Ahli Dewan Undangan Negeri Macang Bubok Pulau Pinang dan Ahli Parlimen Seputeh telah melanggar undang-undang jenayah Malaysia, oleh yang demikian pihak polis mestilah menyiasat suspek di bawah Kanun Acara Jenayah dengan segera. Biarlah rakyat jelata mendengar penjelasan dalam satu perdebatan yang sihat dan dengan ini Malaysia akan mengorak langkah ke satu kebudayaan demokrasi yang lebih matang.

Maka dengan ini Dewan hendaklah mengambil ketetapan untuk meminta Kerajaan melalui Peguam Negara untuk mengambil tindakan tegas terhadap pihak yang cuba meniupkan unsur perkauman dalam agenda politik mereka."

**( Perdana Menteri )**

18. PR-1321-U60120

**Tuan Hee Loy Sian [ Petaling Jaya Selatan ]** akan mencadangkan:-

"Bahawa Dewan ini mendesak Kerajaan menubuhkan mahkamah koroner yang tetap, bebas dan profesional bagi menjalankan inkues bagi semua kes kematian di bawah agensi-agensi penguatkuasaan undang-undang."

**( Perdana Menteri )**

19. PR-1321-U61176

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan mempertimbangkan cadangan untuk kes kematian di bawah tahanan Polis Diraja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan. "

**(Menteri Dalam Negeri )**

20. PR-1321-U61180

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

**( Menteri Pendidikan )**

**RISALAT-RISALAT YANG DIBAWA KE DALAM MESYUARAT**  
**(DEWAN RAKYAT)**

<b><u>TAHUN</u></b> <b><u>2014</u></b>	<b><u>RISALAT/DOKUMEN</u></b>	<b><u>TARIKH</u></b> <b><u>DIBENTANGKAN</u></b>
ST. 20	Laporan Tahunan dan Penyata Kewangan Universiti Malaysia Sarawak (UNIMAS) Bagi Tahun 2012	02 April 2014
ST. 42	Laporan Tahunan Suruhanjaya Pelantikan Kehakiman Bagi Tahun 2013	02 April 2014
CMD. 20	Laporan Tahunan Suruhanjaya Perkhidmatan Awam Malaysia Bagi Tahun 2013	02 April 2014